

## ❖ IESU Y SEREN

(Carol; Tôn: 'Schubert')

Ar draws yr anialwch yn rymus o draw  
 Ymdeithiai plant Israel, a llwydd ar bob llaw;  
 A Balaam, Weledydd, o'i wlad gafodd wŷs  
 I ddod a melltithio'u minteioedd ar frys:  
 Ond gwelai yn codi ryw ddydd Seren wiw  
 A methodd roi melltith ar ben pobl Dduw.

Ymdeithio wnâi doethion ymlaen dros y paith  
 Gan wybod bod Seren ar derfyn eu taith;  
 Brenhinoedd o'r dwyrain yn teithio mewn brys  
 Â golud cenhedloedd, yn aur ac yn thus,  
 I'r baban mewn preseb, y Seren wen dlos,  
 A'r golau'n ei wyneb yn ymlid y nos.

Yr Arglwydd i'w deml yn faban a ddaeth,  
 Cyffroi holl feddyliau'r lle sanctaidd a wnaeth:  
 Simeon a welodd ddydd mawr ei ryddhad,  
 Ac Anna, broffwydes, a daenai'i fawrhad.  
 Y duwdod yn wyneb y baban ei Hun  
 A Seren y Bore yn rhodd i bob un.

Ac yntau'n y deml yn fab deuddeg oed,  
 Fe wyddai mai hon oedd ei gartref erioed.  
 Er tybied ei golli, a'i geisio cyhyd,  
 Fu neb 'rioed yn sicrach o'i rawd yn y byd:  
 Fe dyfodd mewn maint a doethineb a ffydd, –  
 Y Seren ddisgleiriai yn loywach bob dydd.

Er weithiau ei golli yn nŵch y byd,  
 Mae'n aros, heb gilio, yn ei unfan o hyd:  
 Mae'n aros uwchben llety llwm teulu'r nos  
 Yn Seren Dynolryw, oleulon a thlos.  
 Gan edrych ar Iesu ymdeithiwn mewn ffydd,  
 Nes codi'n ein calon y Glaer Seren Ddydd.

**Haydn Davies**